

Broj: 01-III-288/15

Sarajevo, 21.07.2015. godine

PREDMET: Informacija o novom zakonu o radu

Kao što vam je već poznato intenzivnije aktivnosti na Zakonu o radu počele su se provoditi polovinom aprila 2015. godine. Naime, 20.04.2015. godine održan je sastanak na kojem su bili prisutni predstavnici sindikata, predstavnici poslodavaca i Federalnog Ministarstva za rad i socijalnu politiku gdje je utvrđena polazna verzija zakona o radu na temelju koje će se ubuduće voditi pregovori i koji je bio u formi nacrt. Na pomenutom sastanku je dogovoreno da će utvrđena verzija Zakona o radu biti dostavljena stranama u pregovorima kako bi na isti mogli dati svoje primjedbe i sugestije. U ostavljenom roku Savez samostalnih sindikata Bosne i Hercegovine je dostavio svoje primjedbe resornom ministarstvu i formirao pregovaracki tim za Zakon o radu. Međutim, Vlada Federacije BiH je dana 16.06.2015. godine uz dogovor sa Međunarodnim monetarnim fondom i Svjetskom bankom izvršila izmjenu pojedinih odredbi Zakona o radu koji se ne podudara sa tekstom Zakona o radu koji su sindikat, poslodavci i resorno ministarstvo utvrdili na gore pomenutom sastanku i takav tekst zakona o radu dostavili Savezu samostalnih sindikata Bosne i Hercegovine u formi radnog teksta. Nakon toga 24.06.2015. godine ponovo jednostanom voljom Vlade Federacije BiH dostavljena je Radna verzija zakona o radu sa ugrađenim prijedlozima Svjetske banke, uz obavještenje da će Svjetska banka naknadno dostaviti prijedlog za utvrđivanje najniže plaće.

Na dnevnom redu sjednice Ekonomsko-socijalnog vijeća za teritoriju FBiH održanoj 01.07.2015. godine našao se zakon o radu iako je sindikat izričito tražio da se ovaj zakon skine sa dnevnog reda iz razloga što sjednici ne prisustvuje resorni ministar, te da u dopisima resornog ministra nije jasno naznačeno koji je finalni tekst zakona o radu o kojem će se voditi pregovori. Također, sindikat je naglasio da Svjetska banka nije socijalni partner koji treba učestvovati u kreiranju zakona. Na toj sjednici zaključeno je da posljednji tekst zakona o radu, koji je putem Federalnog ministarstva za rad i socijalnu politiku Vlada FBiH dostavila socijalnim partnerima služi kao osnova za raspravu. Rasprava, odnosno razgovori o radnoj verziji zakona o radu počeli su dana 02.07.2015. godine na nastavku sjednice Ekonomsko-socijalnog vijeća za teritoriju FBiH (ESV FBiH), a pod pritiskom Vlade FBiH i poslodavaca traženo je od sindikata da se pregovara svakodnevno u periodu od 16:00 do 20:00 sati. Međutim, zbog drugih obaveza sindikata prema svom članstvu, sindikat nije mogao i nije podlegao ovakvim pritiscima socijalnih partnera usljed čega smo došli u situaciju da Vlada FBiH i poslodavci bez konsultovanja sindikata zakazuju termine razgovora o zakonu o radu, što je suprotno Poslovniku o radu ESV-a FBiH i konvencijama koje je ratifikovala Bosna i Hercegovina. Takav slučaj se desio 15.07.2015. godine kada je predsjednik delegacije Vlade FBiH, odnosno premijer i to uz saglasnost delegacije koja predstavlja poslodavce u ESV FBiH tražio da se 16.07.2015. godine održi Kolegij ESV FBiH bez prethodnih konsultacija sa sindikatom o terminu održavanja Kolegija, čime je još jednom potvrđeno nepoštovanje sindikata kao ravnopravnog socijalnog partnera i gdje su narušeni osnovni postulati na kojima se zasniva socijalni dijalog. Pored toga, na četvrtom nastavku sjednice ESV FBiH održane 15.07.2015. godine Delegacija Saveza samostalnih sindikata BiH u ESV FBiH tražila je odgovor od premijera Vlade FBiH u kojoj formi će biti zakon o radu nakon usvajanja od strane Vlade FBiH. S obzirom da Premijer nije mogao dati adekvatan odgovor na pomenutom

sastanku, obavezao se da će pisano izjašnjenje dostaviti Savezu samostalnih sindikata BiH. Također, Delegacija SSSBiH u ESV FBiH je na pomenutoj sjednici ESV-a tražila sjednicu Kolegija ESV-a u utorak 21.07.2015. godine kako bi se dogovorio dalji termin razgovora o Radnoj verziji zakona o radu te dalji hodogram toka razgovora jer Delegacija SSSBiH u ESV-u nema kvorum za održavanje nastavka sjednice ESV-a za utorak 21.07.2015. godine, te nastavk sjednice ESV-a za 28.07.2015. godine. S obzirom da je održan Kolegij ESV-a 16.07.2015. godine na kojem nisu prisustvovali predstavnici sindikata, Kolegij je ponovo zakazan za 21.07.2015. godine u 10:00 sati a nastavak sjednice ESV-a na kojem će se razgovarati o zakonu o radu, opet mimo dogovora i upozorenja sindikata da neće biti kvoruma za održavanje sjednice, zakazan je za 16:00 sati našto je sindikat ponovo reagovao prema ESV-u jer su ranije navedeni razlozi nemogućnosti prisustva sjednici. Istog dana, tj. 21.07.2015. godine Savez samostalnih sindikata BiH je zaprimio dopis Premijera u kojem navodi da se ipak radi o Nacrtu zakona o radu. Iz navedenog dopisa proizlazi da će zakon o radu koji usvoji Vlada FBiH biti u formi prijedloga i kao takav će se uputiti u parlamentarnu proceduru na usvajanje.

Imajući u vidu sve gore navedeno pozivam članstvo na HITNU mobilizaciju i aktiviranje Operativnog plana Saveza samostalnih sindikata Bosne i Hercegovine radi organizovanja protesta pred Parlamentom FBiH na dan usvajanja Zakona o radu.

Molim da sa ovom informacijom predsjednici granskih sindikata upoznaju svoje članstvo.

PREDSJEDNIK

mr. Ismet Bajramović s.r.